



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Baucau
06 Agostu 2014

Tribunál Distritál Baucau kondena arguidu ba krime tentativa omisídiu ho natureza violénsia doméstika ho tinan 5 prizaun

Iha 30 Julu 2014, Tribunál Distritál Baucau prezide julgamentu leitura akordaun no kondena arguidu AdCM ho pena tinan 5 prizaun tanba komete krime tentativa omisídiu simples hasoru nia feen iha 29 Novembru 2012, iha Sub-distritu Baguia, Distritu Baucau. Sentensa ne'e hanesan ho alegasaun finál hosi ministériu públiku ne'ebé antes ne'e husu ba tribunál atu kondena arguidu ho pena prizaun tinan 5. Aleinde ne'e, tribunál mós kondena arguidu selu kustus judisiál hamutuk US\$30,00.

Mesmu durante julgamentu arguidu nega faktus sira ne'ebé akuza ba nia, maibé tribunál prova bazeia ba depoimentu hosi lezada no testemuña ne'ebé deklara katak arguidu komete duni krime ne'e tuir faktu sira ne'ebé deskreve iha akuzasaun ministériu públiku.

“JSMP hanoin katak sentensa ne'e refleta gravidade ne'ebé arguidu komete ba lezada, mesmu kondensasaun ne'e la lori fila lezada ba situasaun normal hanesan uluk. JSMP hein katak desizaun ne'e bele sai hanesan lisaun ba ema hotu atu maneija sira nia an hodi la uza meus violéntu atu rezolve problema iha futuru no atu hadok-an hosi violénsia,”dehan Diretor Ezekutivu JSMP, Luis de Oliveira Sampaio.

Dalabarak ona JSMP observa katak, maioria kazu sira ne'ebé involve natureza violénsia doméstika akontese tanba diferensia simples ruma ka problema ki'ik entre feen ho laen ne'ebé tuir lolos bele rezolve liuhosi mekanismu komunikasaun. JSMP hanoin katak importante ba governu liuhosi instituisaun relevantes atu investe makas iha edukasaun sívika no rezolusaun konflitu sein violénsia no hasae konsensia publiku kona-ba efeito negativu hosi violénsia.

Antes ne'e ministériu públiku akuza katak iha 29 Novembru 2012, maizumenus iha tuku 18:00, lezada diskuti malu ho nia banin feto tanba laiha hahan. Depois diskuti malu lezada hamutuk ho nia oan na'in rua halai ba iha nia inan aman sira. Arguidu tuir kedas lezada ba iha nia inan aman no ho katana nia belar baku dala rua iha lezada nia kotuk laran. Iha momentu ne'ebá lezada tenta halai maibé arguidu duni tuir no taa dala ida tan iha lezada nia kanuruk. Aktu ne'e rezulta lezada hetan kanek iha kanuruk, sofre tilun diuk nomos nakdedar wainhira koalia.

Relasiona ho aktu ne'e, ministériu públiku akuza arguidu kontra artigu 138 Kódigu Pénal kona-ba omisídiu simples no artigu 23 Kódigu Pénal kona-ba tentativa konjugadu ho artigu 35 Lei Kontra Violénsia Doméstika. JSMP fiar katak ministériu públiku akuza lolos arguidu iha kazu ne'e ho ofensa grave ba tentativa omisídiu, tanba akuzasaun ne'e koresponde ho gravidade hosi krime ne'e.

Iha alegasaun finál, ministériu públiku husu ba tribunál atu kondena arguidu ho pena prizaun tinan 5 tanba konsidera katak faktus sira ne'ebé akuza ba arguidu provadu hotu. Entretantu parte defeza husu tribunál atu aplika pena adekuaudu tanba arguidu laiha intensaun atu taa lezada.

Bazeia ba faktu provadu hirak ne'e no sirkustánsia sira ne'ebé asoiadu ho prosesu ne'e, tribunál konklui hodi kondena arguidu ho pena prizaun tinan 5 no selu kustu judisiál US\$30.00.

Julgamentu ba leitura sentensa ne'e prezide husi juis singulár, Dr. Afonso Carmona, Ministériu Públiku representa husi Dr. Pascasio de Rosa Alves no arguidu hetan defeza husi Dr. Horta Ramos husi advogadu estajiadu.

Atu hetan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl